

von Wulf Wager

## Pillafehleisatz



Heut zutags nemmat dia jonge Mädla ond Fraua oifach a kloine Pille, ond scho send se von ra o'gwollta Schwangerschaft gschützt. A bissle komisch fend i des scho. 's ganz Johr nemmat se dia Pille ond an Weihnachta sengat se "Ihr Kinderlein kommet...!"

Des hot sich sell Mädle au denkt, wo se zu Ihrer Frauärztin ganga isch zom sich a Anti-Babypille vrschreiba zom lassa. Dia Denger hot se au dapfer gnomma ond sich aber irgend-

wann gwondrat, dass se emmer dicker wird ond dass se au ihr Sach' net kriagt. No isch se im Sport plötzlich zsammaklappt ond en's Krankahaus ei'gliefert worda. Dort hot mr no a Schwangerschaft feschtgestellt. Versehentlich hot dui Ärztin dem Mädle a Pille gega Wechseljahrsbeschwerda vrschreiba. Ha no. Der Kerle isch jetzt vier Monat' alt. I ben amol gspannt, was die Versicherung von dera Ärztin sait, wenn des Mädle mol ihre Ondrhaltforderonga stellt. Bleed glaofa.

Genauso bleed war dia Gschicht, die meira Dochdr letscht Woch passiert isch. Dui hot nämlich seit ma halba Johr en Hond. Des ischt an ganz wiefer ond scheenr Kerle – aber halt au en Fetz. An Aoschtra hot doch der Spitz a halbe Packung von meira Dochdr ihre Anti-Babypilla ufgfressa. Ond drweil isch des doch en Rüde. Mir wartet jetzt scho dia ganz Zeit, ob em net a paar Zitza wachsat.

Aber hend Sia scho gwisst: Es geit jetzt au die Pille für Männer. Die isch für danach ond ändert sofort die Blutgruppe ...

Bis näggschd Woch'

Ihr

Wulf Wager